

Date – 12/07/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Tamil Nadu Coimbatore-a Karunya Institutes of Technology & Sciences (Deemed to be University) Convocation chu vawiin khan Chief Minister Pu Lalduhoman a hmanpui.
2. Nizan zanlai khan Aizawl Central Jail atangin tang pahnih an tlan chhuak a. Vawiin tlai thleng hian man an la ni lo.
3. Prime Minister Narendra Modia chuan Rozgar Mela chu sawrkarin thalaite thumchhak nana theihtawp a chhuah zia ti langtu anih thu a sawi.
4. AAIB chuan Air India thlawhna Ahmedaba chesual an chhuina report hmahruai an tihchhuahah thlawhnaa tuialhthei inpek kualna thununtu switch a dik loin a lo inthlak tih an hmuchhuak

<><><>

CHIEF MINISTER

Tamil Nadu Coimbatore-a Karunya Institutes of Technology & Sciences (Deemed to be University) chuan vawiin khan an campus-ah Convocation vawi 31 na an hmang a. Chief Minister Pu Lalduhoma chuan khuallian niin a hmanpui.

Karunya University hian Chief Minister hi Honorary Doctorate Degree an hlan nghal a ni. Pu Lalduhoma chuan, Honorary Doctorate Degree an pek chu an rawng a bawlsak mek Mizoram, ramchhunga zia leh chhiar tamna ber te chenna ram mipuite aiawhin dawng tih a sawi a. Zirnain hmasawna leh changkanna a thlen zel a ni tih lantirnaah a ngaih thu a sawi.

Byte: Chief Minister

Chief Minister chuan, India rama zirna in tha tam tak chu Kristian te din leh enkawl an ni a ti a. Zirna te, hriselna te, hnuchham enkawl na leh khawtlang rawngbawl na kawng dangah pawh, ram pum huapa mipui awm zat atanga tehin tlem

hle mah se, ringtute hian an thawhhlawk thin a ti a. Karunya University pawh chutiang rilru pu chung a din leh kalpui a ni a. India chhim lama University tha leh changlung pawl tak a ni chho ta hial a. Ramin kan hlawkpui em em a ni, a ti.

Zirlai hlawhtling thar te hnenah pawh thu chahin, tih tum bul fuk nei lo va hlawhtlinna chu a pawnlawi fo a ti a, ram leh khawtlang tana mi tangkai tak nih tumna neia an kawng zawh zel turin a fuih a, khawvel hian mithiam a mamawh belh satliah lo va, midangte thatna tura inpe, hmangaih taka rawng bawlsaktu tur mithiam a mamawh zawk a, ngaihhlut tur dik tak ngaihlu chungin a tha zawnga khawvel thlak thlengtu nih tum vek ni se, a ti.

Executive Council of Karunya Institute of Technology & Sciences (Deemed to be University) chuan Pu Lalduhoma chu hmingtha taka khawtlang rawng a bawl thinna te, hmahlir tha tak nei ram hruaitu a nih vang te, remna leh muanna a awm theih nana nghing lo va a inpek thinna te, hmasawna leh mipui sawrkar dinna kawnga a hnathawh tha tak tak te avangin Doctor of Letters a hla niin an sawi a ni.

<><><>

ALIMCPO

Ministry of Social Justice & Empowerment hnuai ami - Artificial Limbs Manufacturing Corporation of India (ALIMCO) chuan tunlai hian Mizoram hmun hrang hrangh Assesment Camp an nei mek.

Assesment Camp an neih mekah hian, kum 60 chin chunglam tan leh rualbanlo te tan hmanraw hrang hrang Folding wheelchair, commode leh tiang hrang hrang, kawngghren hlai, khup tuamna, Nghawng tuamna, bengdar leh wheelchair te an sem chhuak a ni.

Vawiin khan Lunglei MUP Hqtrs.Golden Jubilee, Saikuti Hall-a lawm naah Social Welfare Deptt Lunglei nen tangkawpin kum 60 chin, a mamawh apiang te tan dilna an hawng a ni. Hmanraw semna hi Lunglei DC ruahmanna in Project Leap tih vuah a ni a. Tanpuina dil tur te hi kum 60 chin an nih a ngai a, Adhar Card leh Income Certificate thil tel tur niin thla khatah Rs 15,000 aia tam lo lalut an nih a ngai bawk.

ALIMCO te hian Zoram Medical College & Hospital, Falkawn-ah Office neiin kum 2023 July atangin bungrua hi an sem tan a, 1300 vel sem a ni tawh a. Assesment hi Khawzawlah neih tawh niin kumin April thlaah khan Lungleiah neih tawh a niin, a vaiin hamthatna dawngtu mi 742 an awm a ni.

Hma lakna neih tawh chinah kum 60 chin mi 687 leh Rualbanlo UDID card nei mi 54 an ni. June leh July khan Aizawl South 2 leh 3-ah assesment hi neih tawh niin, Lungleiah hian assesment tih nawn leh a ni a. Tunah hian Social Welfare deptt chuan an buaipui a ni.

<><><>

EMMY AWARD

'Myanmar Civil War' Documentary producer Mizoram Journalist pahnih Pu HC.Vanlalruata leh Isaac Zoramsanga-te chu vawiin khan Mizoram Journalist's Association in lawmpuina an hlan.

Vawiina Journalist pahnih te chawimawina hun hi Aizawl Press Club-ah neih a ni a, MJA President Pu C. Lalrambuatsaiha chuan tun hnaia Emmy Award dawng te pahnih chu lawmpuina hlanin khawvel huap lawmman ropui an dawng chu chhuanawm atih thu a sawi a, Chanchinbumite chawimawina sang dawng thei MJA member an awm chu lawmawm atih thu sawiin MJA dinhmun sangah a hlangkai a ti a, mi dangte tana entawntlak annih thu sawiin MJA dan bu in a sawi angin journalist chhuanawm te hnena an hlan thin chawimawina an hlan tih a sawi a ni.

He hunah hian Emmy Award dawngtu pahnih Pu HC Vanlalruata leh Tv Isaac Zoramsanga ten thu an sawi a, Mizo journalist pahnihte hi BBC tana project-ah hian field producer hna an thawk a, Emmy Award an dawnna hi Outstanding Continuing News-Coverage-Short Form Category-ah a ni.

<><><>

END

Excise and Narcotics Department chuan kum chanve chhungin ruihhlo thahnem tak an man a, hemi kaihnawihah hian mi 3906 man niin lirthei 91 an man tel bawk.

Excise and Narcotics Department thuchhuah tarlan danin kumin kum tir atangin heroin kg 34 chuang man tawh a ni a, ganja kg 156 chuang man niin opium gram 945 man a ni a, damdawi hrang hrang tam tham tak man niin rakzu litre sing 3 sang 9 dawn man a ni a, zu bilh lai tin tham tham tak man niin dawidim kg 75 bakah sap zu tam tham tak leh soju leh BEDC pawh man tel a ni.

VC

(Excise and Narcotics Department hian ruihhlo leh a kaihnawih NDPS Act 1985 hmangin nasa takin ruihhlo a tlem theih nan hma an la a, dan bawhchhiate dap chhuah bakah ruihhlo do kawngah tlawmngai pawl hrang hrang nen thawkho in ruihhlo a rem theih nan theihtawp an chhuah mek zel a ni.)

<><><>

PRISON BREAK

Nizan zanlai khan Aizawl Central Jail atangin tang pahnih an tlan chhuak a. Vawiin tlai thleng hian man an la ni lo.

Tang tlan chhuakte pakhat zawk hi Thingsulthliah-a Hospital Area ami Lianhmingthanga (kum 36) a ni a, ani hi POCSO case nei a ni a. Pakhat dang chu Malsawmdawnga (kum 28) niin Farkawn ami a ni thung a, ani hian ND & PS Act thubuai nei a ni thung.

Police-te sawi danin Tang tlan chhuakte hian an awmna cell ceiling ti chhiain, an cell atangin an chhuak a, rizai hmawra rod kâwm an dah chu Jail hungna banga lawn liamna atan an hmang a ni. Tang tlan chhuakte hi Police ten ngawrh takin an zawng mek a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

MZP

Mizo Zirlai Pawl MZP chuan Mizoram chhunga Hnamdang mistiri leh diklo taka mizo hming hawh a sumdawngte chu a tul anga dapchhuah a hmalak an rel.

Nimin khan MZP hian General Headquarters Executive Meeting vawi 645-an an nei a, he hunah hian hnam dang sumdawng chungchang sawiin, tunlai a vai mistiri-te hnathawh dan zirchianna neih a; Contractor ang maia hnathawh an tum leh, a chhawr tute duh dan aia hnam dangte duh dan Mizo mipuiten an zawm dual mai chu tih tawp a nih theih nan hmalak nise, an ti.

MZP hian karleh Nilaini khian an rolrelna sang pahnihna Federal Council Sitting vawi 59-na an nei dawn a, he hunah hian Mizorama Rel lo lut tur leh ILP chungchang bakah kawngpui siamtu NHIDCL te hnathawh dan chungchang a hmalak dan tur te an rel dawn a ni.

<><><>

ROZGAR MELA

Prime Minister Narendra Modia chuan Rozgar Mela chu sawrkarin thalaite thuamchhak nana theihtawp a chhuah zia ti langtu anih thu a sawi. Vawiina sawrkar hna hmu thar mi sing 5 leh sang 1 te hnena appointment sem runpui Rozgar Mela a hmannaah he thu hi sawiin Pu Modia chuan Viksit Bharat nawrkaltu chu thalaite an nih thu a sawi a. Vawiinah chuan khawvelin India theihna a hrechiang tawh tih a sawi bawk. Pu Modia chuan Razgar Mela chu fakim thalai nuai telin central sawrkarah hna nghet an nei tawh a ni a ti bawk.

<><><>

AIR INDIA

Aircraft Accident Investigation Bureau (AAIB) chuan Air India thlawhna Ahmedaba chesual an chhuina report hmahruai an tihchhuahah thlawhna tui inpek kualna thununtu switch a dik loin an lo inthlak tih an hmuchhuak.AAIB report phekk 15-a chhahah hian Boeing 787-8 thlawhna hi a thlawhchhuah dawnah a fuel switch chu a tlan laia awm tur anga awm loin tui lut thei loa dahna cutoff switch ah alo inthlak tih an tarlang a. Hei vang hian thlawhna engine ah tuialhthei lut loin a thlawk a, hei vang hian thlawhna engine te a thih hnuah thlawhna hi a tla ta niin an sawi. Thlawhna khalhtu pilot ten he thil an sawidunna an aw ri pawh record ah hriat theihin a awm thu AAIB chuan sawi a ni. Puan tawh angin thla hmasa ni 12 khan Air India thlawhna Boeing 787 hi Ahmedabad ah chesualin a chhunga chuang mi 240 an thi a ni..

<><><>